

# «La cuorsa liunga ha potenzial ella regiun dil Gottard»

Experts dil sport nordic discuteschan la fin d'ust davart las pusseivladads da svilup e collaboraziun

DA HANS HUONDER / ANR

■ **Dapresent examineschan docents dalla Scol'aula professiunala Berna la puschida ed il potenzial dalla cuorsa liunga ella regiun dil San Gottardo. La fin d'ust ha liug in workshop cun persunas engaschadas en gremis internaziunals dalla cuorsa liunga. Medemamein ha il Program San Gottardo 2020 iniziav in lavur pertuccont l'agricultura.** Ella regiun dil San Gottardo gioga la cuorsa liunga ina impurtanta rolla. Loghens sco Campra, Goms ni era Trun e Sedrun organischeschan buca mo concurrenz nazionalas ed internaziunals, mo bein gaudan era la simpatia dils amitgs dil sport nordic che separticipeschan buca a cuorsas. En quels loghens exista ina infrastruttura da cuorsa liunga ch'attila unviern per unviern bia gliued. Puschidas da cuorsa liunga dat ei denton era en auters loghens dalla regiun, per exempel la Loipa Cadi ni era loipas ad Andermatt ni ella Leventina. «Nus essan dil meini che quels loghens ensemen seigien gia da gronda valeta per la cuorsa liunga, mo vesin denton era ch'ei dat aunc potenzial da svilup», di Simon Coray, responsabel per quei project enteifer il Program San Gottardo. Ensemen cun exponents dils loghens ei il project pertuccont la cuorsa liunga vegnius lantschus.

## Maun en maun

«L'idea che nus havein sto ir a prau cun las imaginaziuns dils pertuccai els differents loghens», puntuescha Simon Coray. Il mument ein docents dalla Scol'aula



**Simon Coray, collaboratur el svilup da projects tier il Program San Gottardo 2020, ei perschuadius che la cuorsa liunga e l'agricultura ellas regiuns dil Gottard han aunc potenzial da svilup.**

FOTO H. HUONDER

professionala Berna lundervi d'inventarisar l'entira puschida da cuorsa liunga dalla regiun San Gottardo. Quella cumpiglia buca mo l'infrastruttura, mo bein era la puschida e las organizaziuns involvidas. Dalla scola spetga il Program San Gottardo denton buca mo ina gliesta dil status quo, mo bein era propostas co la puschida pudess vegnir migliurada: «La finamira ei in standard che po satisfar al las pretensiuns internaziunals, pia in top level. En quei connex patertgein nus era vid ina «tour de ski San Gottardo» che

savess cumpigliar ils differents loghens.» Per concretisar l'idea han ils iniziants envidau persunas da renom internaziunal ad in workshop che ha liug la fin d'ust a Mustér. Denter quellas sesanflan il directur da FIS Marketing SA, Jörg Capol ni era Hippolyt Kempf, anteriur campiu olimpico sco era Werner Frieser (Sefeld Nordic) ed Alfred Prenn (Dolomiti Nordic Ski). Ensemen cun ulteriurs participents vegn discutau davart las pusseivladads da svilup da quei sector ella regiun dil Gottard. «Da quella scuntrada

spitgein nus naturalmein impuls concrets», di Simon Coray.

## Co vinavon?

La fin settember vegn la Scol'aula professiunala Berna allura a presentar sia lavur. Quei duei succeder el ravugl dils directamein pertuccai dalla cuorsa liunga dils differents loghens. En connex cun quei arranchament duei era vegnir discutau co cuntinuar cul project e sin tgei elements seconcentrar el svilup. «Silsunter ha ei num fixar la strategia surre-


giunala ed elavurar ina visiun pil sector nordic. Aschilunsch ch'els pertuccai s'accordan, suonda lu en ina tiarza fasa la realisaziun dils projects», di Simon Coray ch'ei engaschus tier Program San Gottardo dapi l'entschatta 2012 e ch'ei leu collaboratur el svilup da projects.

## L'agricultura el focus

Sper la cuorsa liunga pren il Program San Gottardo era l'agricultura dallas regiuns pertuccadas sut la marella. Era en quei connex ha el surdau in'incarica ad ina scola, numnadamein alla Scol'aula per agricultura, forestalesser e scienza da victualias a Zollikofen. Involvi el project ein era ils uffecis d'agricultura dils quater cantuns, sco era ulteriuras instituziuns dil puresser. Semegliantamein al project dalla cuorsa liunga vegn era inventarisau cheu la puschida sco era ils canals da vendita. En ina secunda fasa duei vegnir eruiu tgei pusseivladads da svilup ch'existan e che han aunc potenzial. Medemamein han ils iniziants la finamira d'analisar il basegn dalla gastronomia per products agrars dalla regiun. Cussegliazions da persunas specialisadas en quei sector vegnan a cumpletar il rapport final da quella lavur che vegn presentaus la fin da november. Tenor Simon Coray vegn quei project coordinaus cun il Parc Adula: «Nus havein constatau ch'ei manca il mument finamiras ed ideas innovativas pil sector dall'agricultura en nossa regiun.» En connex cun quei project duei era vegnir evaluau l'idea d'ina plattafuorma da vendita ni era ina cooperaziun cun Alpinavera.



**Peter Enz, menader dil curtgin botanic dall'universitad da Turitg, ha raquintau als participents dallas strategias che las fluras alpinas han sviluppu per seproteger.**



FOTOS A. BEELI

# Tiel scazi sut il Fanella

Excursiun botanica sil lag da Guraletsch

■ (abc) **Dapi gitg gudin nus ina stad da mai murir. Fertion ch'igl ei giu ella val forsa gia memia schetg ed il pastg pirescha, eis ei si els aults primavera. La Pro Sagogn ha organisau sonda vargada ina excursiun botanica naven da Zervreila sil lag da Guraletsch. Silla spassegiada tiel lag situav sin 2409 meters sur mar ha il menader dil curtgin botanic dall'universitad da Turitg, Peter Enz, mussau igl entir spectrum dalla flora alpina.** Ir a viandar ei dapi zacons onns in passatemp fetg modern. Ins tschontscha schizun d'in trend absolut. Per las destinaziuns turisticas e per Grischn Vacances ei la reit da sendas da viandar da varga 10 000 kilometers l'attracziun absoluta. Biars turists ed indigens che van a viandar sillas rutas marcadas han ina finamira: Viandar d'in punct a l'auter enteifer in cert temps. Duas uras per quella ruta leva, treis uras

per ina miezleva, quater per ina pli pretensiusa e tochen sis per ina greva. Ils muossavias mellens e las marcaziuns alvtgietschen-alm indichesch la ruta e garantesch ch'ins arriva ad uras el liug final. Ins viandescha sil trutg mironde sill'ura, denton negligiond quei che crescha agl ur. Sonda vargada ei quei stau empau auter. Il menader dil curtgin botanic dall'universitad da Turitg, Peter Enz, ha accumpignau ina gruppa da varga 20 persunas che ha vuliu emperder d'enconuscher empau meglier la flora alpina.

## Il blau-roial dalla genziana

Naven dalla caplutta da Zervreila tochen sil lag da Guraletsch sut il Fanelhorn ha il specialist adina puspei giu da rispunder damondas e declarar detagls tier las fluras. Finamira eis ei stau da seser giu sil crest sur il lag ed admirar

las steilvas e las astras. Quei punct culminont ha buca muncau. A finadin dalla gruppa ha igl aspect dallas steilvas, accumpignadas dallas flur-tschugalata cul tgau brin-ner, las astras blau-oranschas ed ils semperviv grass fatg impressiun e dau la satisfaziun d'ina natira incredibla. Il specialist ha declarau detagls dallas fluras che sedostan cun atgnas strategias encunter la ferdaglia ed il vent. Pli ault ch'ins vegn e pli cuorts ch'els fustitgs dallas fluras ein. Duront la tura naven da 1900 sin 2400 meters sur mar eis ei era stau interessant d'observar ils differents scalems dalla vegetaziun alpina. Fertion ch'igl era giu dem gia stad ed ins ha viu ils emprems ambassadurs digl atun. Il brutg d'atun, differents tujas, geneiver e la genziana tudestga han fatg empau nostalgia d'ina stad vargada. El scalem amiez ha la gruppa da viandar denton saviu sele-

grar dall'arnica, dallas anemonas e dall'iva. El tierz scalem essan nus arrivai ella primavera alpina. En certs loghens eran las soldanelas strusch vargadas ed il blau-roial dallas genzianas pintgas ha fatg speranza. Il botanicher da Turitg ha explicau dallas tecnicar che las fluras ha sviluppu e co certas ein emigradas ils davos dieschmelli onns ell'Europa centrala. Era la steilvalva s'auda tier las immigradas. Culla retratga dils glatschers eis ella ida sin viadi ed han conquistau novas regiuns muntagnardas cun vegetaziun adattada e terren da caltschina. La historia dalla flora alpina ha connex culla midada dil clima che ha giu liug avon varga dieschmelli onns.

Ils nums dallas fluras ein dil reminent in capetel per sesez. Silla tura ha Peter Enz saviu classificar varga 150 fluras. Mingina ha in num latin ch'il menader

ha saviu identificar claramein. Cun el aveva Peter Enz il telefonin e sin quel cargau igl «app» cuagl inventari electronic dalla flora alpina. Denter las fluras ch'els participents han era viu, ha il specialist giu tschaffen d'ina trovaglia cul num latin «Pyrola minor». Ei setracta d'ina plonta pintga e discreta cun fluras alvas che semeglian alla flora fredabien. Peter Enz ha registrau l'anflada ella datoteca botanica federala. Il curtgin alpin ch'els participents han entupau sur il lag da Guraletsch ha fatg scurlar il tgau enqualin. Zatgei aschia havevan els buca spitgau. L'excursiun ha giu liug exact il dretg mument. Las steilvas en plena fluriziun, pintgas e grondas, singulas ed en gruppas, accumpignadas dallas astras alpinas, dallas flurs-tschugalata, violas ed autras ei la pagaglia per gliued che appreciescha quei che crescha dretg e senierter dalla senda da viandar.